

Date – 28/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma kaihhruai High Level Task Force on the North East Economic Corridor te chuan nimin tlai khan online meeting an nei.
2. Mizorama sumdawng thla khata cheng nuai 1.75 hmu tling chinin GST registration an neih chuan Mizoram ‘revenue’ chu nasa taka a pun theih beisei a ni.
3. Election Commission chuan state leh UT 12 ah Special Intensive Revision (SIR) of Electoral Rolls a kalpui leh dawn.
4. External Affairs Minister Dr.S.Jaishankar-a chuan khawvelin firfiaka chetna lakah ngaihnathiamna nei lova a do zel a ngai a ti.

<><><>

CM

Chief Minister Pu Lalduhoma kaihhruai High Level Task Force on the North East Economic Corridor te chuan nimin tlai khan online meeting an nei.

Meeting ah hian he High Level Task Force ten meeting an lo neih tawh atanga rawtna lutte behchhana report an duante sawifiah a ni a, an rawtna siam zingah hian Bangladesh leh NE state khawpuite inkalpawhna kawngpui lian neih chungchang te, India - Myanmar - Thailand inkalpawhna tur kawngpui chak zawka thawh te, Guwahati chu hmunpuia hmang a Helicopter hmanga NE khawpuite inthlunzawmna tha zawk siam te, Inland Waters Ways pawimawh Barak, Brahmaputra leh a dangte thuam that te, Rail hmanga hmarchhak khawpuite thlunzawm a, rel service man tlawm a awm theih nana Electric Train hman uar te, Internet Service tha zawk leh zau zawk din te, border trade Infrastructure din thar leh tihchangtlunna te leh hmarchhak ramte tana product branding awlsam leh market zau zawk siam te leh rawtna dang tam tak a tel a ni.

Meeting hi DoNER Minister Pu Jyotiraditya M Scindia leh member state aiawh Minister te an tel a. An sawihote atang hian Final Report an siam tawh dawn a ni.

<><><>

BANDH

MNF Party Vice President leh Leader of Opposition Pu Lalhhandama Ralte chuan Forest Conservation Amendment Act pawm duh loh lantir nana naktuka Total bandh an buatsaih tur chu MNF tan a ni lo a, ram leh hnam tan a ni a ti.

Nimina Aizawla an party office Mizo Hnam Run-a inkhawm ah he thu hi sawiin, ZPM sorkarin Central duh dan leh mipuite rawn lova FCAA 2023 a pawm avangin Article 371G hnuaia ram neitu an nihna a sut buai avangin Mizo mipuite

thlavanɡ hauh nan total bandh hi neih a ni dawn tih sawiin, FCAA 2023 chu an hotute nen do tul an ti a, sut leh a nih theihna turin thla hmasa September ni 3 khan Assembly Speaker hnenah special session kova ennawn leh turin an lo thlen tawh a. Hun engemaw chen an ngaihchan hnuah ram leh hnam humhim turin Mizoram pum huap total bandh neih chu an titlu ta tih sawiin, ram leh hnam chhan turin theihtawp an chhuah zel dawn a ti.

Pu Lalchhandama chuan tunhnaiah Chief Minister chuan FCAA leh 371G a sawi chungchang thudik lo leh zirtirna him lo a sawi ni a sawiin kum 2023-ah Parliament-in FCAA a pawm a, kum 2023 Aug 4-a gazette-a a chhuah khan MNF sorkar chuan NGO, Kohhran, political party leh environment pawlte rawnin an ngaihdan a lakhawm a. Kum 2023 Aug ni 22 khan Pu Zoramthanga kaihhruai sorkar leh opposition-ten lungrual takin a dodalna an pass ta a ti a, khatih laia phur ber leh sawi huai ber kha vawiina Mizoram CM hi a ni tih sawiin, sawi loh ang zela awm thiam chief minister a ni, a t.

Pu Lalchhandama chuan Mizoten ram dan hnuaia inhumhimna an neih that ber Article 371G hnuaiah hnam dan leh nihphung customary law leh ram neih dan-land ownership chungchangah Parliament dan pass-te chuan Mizoram Assembly remtihna tel lovin an barh lui thei lo a ti a, FCAA hnuaiah chuan sixth schedule hnuaia district council thuneihna pawh a tiderthawng ta vek a, an hnuk kir lo a nih chuan theihtawpin hma an la zel dawn tih a sawi a ni.

Hetihlai hian Agriculture Minister Pu PC Vanlalruata'n nimin vek khan Aizawl-a ZPM Office ah thusawiin Forest (Conservation) Amendment Act, 2023 chu Central-a sawrkar mek NDA siam a ni a, chutih laia NDA thawhpuitu MNF ten dolet a, mipuite tana harsatna thlen zawng leh mi eizawna tibuai zawnga total bandh huaihawt an tum chu kalphung hlui zia a ni a ti.

Pu PC Vanlalruata chuan ram hmasawn tura an mu tan lian tak mai chu forest clearance a ni tih sawiin, FCAA chu House-ah ngun taka member-ten an sawi ho hnuah tha tiin an pass a ni a ti a, chutih laia mipuite tana harsatna thlen zawng leh mi eizawna tibuai zawnga total bandh huaihawt an tum te chu kalphung hlui zia a ni a ti a, khawpui kaihnawih a eizawna nasa takin a nghawng dawn a, sumdawna hrang hrang - restaurant, transport, hotel, financial services, professional services, construction leh mining leh a dangte chu nasa takin a nghawng dawn tih a sawi.

Agriculture Minister chuan mithiamte chhut danin ni khat total bandh an huaihawt hian cheng nuai sang hnih chuang an hloh dawn a, a uiawm hle a ti a, chuvangin total bandh huaihawt tum tute pawh inngaihtuah tha leh se, an duh lohna chu chanchinbu leh social media-ah an tarlang hnem tawk tawh a, mi eizawna nghawng zawnga sawrkar do chu ngaihtuah tha leh turin a ngen tih a sawi a ni.

<><><>

GST REFORMS

Mizorama sumdawng thla khata cheng nuai 1.75 hmu tling chinin GST registration an neih chuan Mizoram ‘revenue’ chu nasa taka a pun theih beisei a ni.

Mizoram Resource Mobilization Committee (MRMC) hnuaia Sub-Committee on Tax and Non-Tax Chairman Pu Haukhuma Hauzel, IAS (Rtd) chuan he thu hi a sawi a.

Mizoram Sawrkar in tax leh non-tax revenue a lak a pun theihna tura din, Mizoram Resource Mobilization Committee (MRMC) hnuaia Sub-Committee on Tax and Non-Tax Chairman Pu Haukhuma Hauzel, IAS (Rtd) chuan GST danah sumdawngin kum khata a hralh chhuah cheng nuai 20 a tlin chuan GST registration a nei ngei tur a ni a, chuvangin Aizawl leh Mizoram khawlian deuh deuha dawrkai/sumdawng thla khata cheng nuai 1.75 hmu tling chin chu in register ngei tur tihna a ni tih sawiin, Sumdawngte chuan GST an pek tur dik tak an pek chuan Mizoram ‘revenue’ chu nasa taka a pun theih a beisei a ni a, chutiang a nih chuan Zoram mipui tan tangkaina nasa tak a thlen thei dawn a ni a ti.

Thla liam ta September ni 22 atanga GST dan thar hman a nih hnuaia Champhaia sumdawng lian zawk ten GST dan thar an zawm tha ni a sawi a ni a, Champhaia kan Correspondent in Deputy Commissioner of State Tax, Champhai Zone Pu David TS Zova a kawmna ah GST dan thar chu sumdawng lian te an zawm tha hle nia a hriat thu a sawi a, GST registration nei leh nei lovah thil man a nghawng dan a inan loh avangin dawrkai zawng zawngah thil man a tlakhniam phah vek rih lo a ti a. Stock thar an zawrh vek hunah erawh sumdawng ten rate thar angin thil an hralh vek tawh dawn tih a sawi.

Pu David TS Zova chuan GST rate thar hman hnuaia survey an nei tih sawiin Rate hniam tur tihnam lote pawh tihnam nghal turin an hrih a ti a, Sumdawng thenkhat chuan a chhut dan an thiam loh vang leh a rate thar an hriat chian loh avanga tihnam dan tur chin an hriat loh thu an sawiin heng sumdawngte hi a chhut dan tur an zirtir bakah an hralhna man turte pawh bungraw panga ziah thatsak te pawh an nei tih a sawi a ni.

<><><>

ZMC

Zoram Medical College & Hospital chuan nimin khan rilru hriselna chungchanga inzirtirna Mental Health awareness hun an hmang.

He hunah hian ZMC&H Department of Psychiatry-a Clinical Psychologist Pu Lalawmpuia chuan rilru hrisel neih theihna tur kawng hrang hrang MBBS zirlai te hnenah a sawifiah a. He World Mental Health Month pual hian MBBS zirlai te chuan poster an insiamsiak a, rilru hriselna thuthiam te an sawi rual a ni.

<><><>

SAITUAL DIST BORDER COMT

Saitual District-a Indo-Myanmar Border hungna panna tur kawng siam chungchangah Saitual District Border Coordination Committee chu nimin khan DC Conference Room, Saitualah Pu Lallawmawma, Addl DC kaihhruainain an thu khawm.

He hunah hian Addl DC chuan thu a sawi a, kawng siam chungchangah Hrianghmun khaw mipuite hmasawna tur chu an duh ber a nih rualin kawng siam tur chuan kalphung mumal tak zawm a ngai thin, a ti a, mipuite duh dan ang veka kal a rem loh chang a awm thin a ni, a ti. Addl DC chuan Indo-Myanmar Border hungna panna tur kawng, Hrianghmun-Tuisa river approach road chu ei leh bar atana inkalpawhna kawng a ni lo tih hriat a tul a ni, a ti a, ram ven himna tur kawng atana hman a nih dawn avangin mipui chenna hnaiha siam a rem lo tih chu Hrianghmun mipuite pawhin an hriathiam hram hram a tul a ni, a ti.

Hethutkhawmah hian Hrianghmun-Tuisa lui kawng siam tur chungchanga harsatna awm te sawiho a ni a, Hrianghmun khawtlangin kawng pahnih an chhawp chhuah te chu Border Roads Organisation te chuan a hmunah enfiahin ground survey an nei a. Heng kawngte hi a awihin, a leilung a nghet lo a, min mai thei dinhmuna a din avang te, Indian Roads Congress (IRC) standard a phak kim loh avang te leh kawng awm sa bakah mipui chenna a hnaih vangtein BRO lam chuan kawng dang an chhawp chhuak leh ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

SIR

Election Commission chuan state leh UT 12 ah Special Intensive Revision (SIR) of Electoral Rolls a kalpui leh dawn. SIR tihna turte hi Andaman and Nicobar Islands, Lakshadweep, Chhattisgarh, Goa, Gujarat, Kerala, Madhya Pradesh, Puducherry, Rajasthan, Tamil Nadu, Uttar Pradesh leh West Bengal te an ni a. Chief Election Commissioner Gyanesh Kumar chuan he revision hi roll langtlang leh dik lo awm loa siam anih theihna tur a ni a ti a. SIR thawh hnihnaah hian voter vaibelchhe 51 tuamchhuah an ni dawn tih sawiin vawiin atangin enumeration form lakchhuah theih a ni ang a, Booth Level Officer training pawh kalpui nghal a ni ang.

<><><>

EAM

External Affairs Minister Dr.S.Jaishankar-a chuan khawvelin firfiaka chetna lakah ngaihnathiamna nei lova a do zel a ngai a ti. Nimina , Malaysia khawpui Kuala Lumpur East Asia Summit vawi 20-naah he thu hi sawiin Dr.Jaishankar-a chuan firfiakte laka beihpui thlak mekah tlawm mai chi a nih loh thu sawiin khawvel ram hruaitute chu thawhhona tha zawk nena hmala turin a sawm a. India chuan ASEAN ramte nena tuifinriat venhimna kawnga thawhhona tha neih zel a tum thu a sawi bawk a ni.

<><><>